

# Pauro Timoteo bo ziwatahakazo

Pauro siakryiukrēnikitsa hurukwy eze niapykyrykze Timoteo bo ziwatahakazo. Timoteo tatse wata ziknazukniki. — Atsoko pikbezenaha — nikara. Deus Pauro ziapewywyky iwaze katsa kino niwatihi tanymyryky.

**1** <sup>1</sup>Uta Pauro. Timoteo ikia bo papeu humo piwatahaka. Tubabatu Sesus Kiristu kytsa bo zikpeha, kape niy:

— Ikia sizubatsa bo tsimy. Deus wasania ty tsimytsaso. Kytsa kaharere bo hỹ mykaranaha zeka kahumo sispirikporētsa moziknaha asaktsa tahawahi Deus tuk mynapykyryknaha tsimy — niy.

<sup>2</sup>Timoteo ikiakta katse wata tsikyzyk. Utakta ikia humo kamypokzitsiarēta. Deus myzo, Sesus Kiristu mypehakatsa sibo atsyhyryze mopamykysokoze ispe my:

— O kazo Timoteo humo amypokzitsiukta. Ihumo tsimypokzitsiarēta. O kazo ahumo tsakurēta mozik — my. Iwa Deus bo atsyhyryze mopamykysoko.

**Hawa Deus humo kakurēta my. Abaka kasoho ahabo piwataha.**

<sup>3</sup>Kyze uta Deus bo motsasoko:

— O kazo ikia zuba tsamysapyrēta — mykara. Deus tsyhyryze pitsumuēhīkī mykara. Pykyhytu iharere bo hỹ mykara. Iharere humo batu kaspiriktsokdahu. Myzotsa niwatihi iharere bo hỹ ziknakaranaha. Deus bo mopamykysokoze ikia soho ty okoroze unata ibo mopamykysoikik. Ikia soho humo mytsaty mynakara. <sup>4</sup>Ikparakze tsasukatsihikrēta. Tsikpuziuku ana bo hi mytsaty mykara. Ikia bo mynakozore tsihikik. Ikia bo mynakozore zeka kakurēta. Kakurēta h̃y. <sup>5</sup>Ikia Sesus humo tsimyspirikpoko ana bo hi mytsaty mykara. Ihumo aspirikporēta h̃y. Tubabatu aikiwa Roide atatsahi Sesus humo tispirikporētatsa. Iwaze aje Eunise kino niwatihi ihumo tispirikporētatsa. Abaka ikia kino niwatihi ihumo tsimyspirikpoko ana humo hi kahyrinymyrēta.

<sup>6</sup>Iwatahi abo motsasoko. Tubabatu Sesus tuktsa tuk ispirikpokota tsikyzyk. Uta katsyhyrypetsa ty aharek humo paik paik iky. Ispirikpokota tsikyzykze

katsyhyrypetsa ty aharek humo paik paik icy, Sudeutsa sopykwy ty icy. Ana bo hi mytsatzotytkta! Deus zikwy abo izumu. Ihyrikoso atuk mynapykyryk. Pykyhytuty ihyrikoso tuk tsimyzuruku. Izikwy humo tsimyzuruku. Ana bo hi mytsatziutytkta! Iwaze izikwy humo tarabajaziu tsimykaru.

<sup>7</sup>Deus hyrikoso mybo izumu. Ihyrikoso humo batu mypyby. Deus mybarawy nizunikita tazikwy mybo inazukmywy. Izikwy humo katsa sizubarêtsa humo mymypokzitsirêtsa. Katsa mypetu mysopyk iwatsahi mysapybyitsa ba tsinakaranaha. Deus hyrikoso humo mypetu mysopyk.

<sup>8</sup>Kytsa asahi Sesus harere bo batu hỹ nikaranaha sakyriukrênikitsa hurukwy bo zikoktyhyryknaha. Sesus harere iktsasokoze katsipa humo zikoktyhyryknaha. Abaka sakyriukrênikitsa hurukwy eze tu mopykyryk. Iwatatu kahumo batu asikpyby. Sesus harere humo kino niwatihi batu asikpyby. Sesus harere humo sinini mykara. Ikia kino niwatihi Sesus harere tsimysasokoze sinini tsimykaru. Iwatuze sinini tsimykaru Sesus harere tsimysasoikikze Deus patsumuêhĩ. Sinini tsimy zeka atahi papunihikwyky. <sup>9</sup>Deus kino botu ityryk nimywatawyhik. Tapara mybarawy eze ky nizukni iwaze bjoikpe nizukni iwaze botu nimywatawyhik. Katsa mysapyrêtsa humo batu myty watawy. Myhumo tsimypokzitsiarêta ana humo hi nimywatawyhik. Deus tihi:

— O amy ty isapyrênikia ty sibo nyny my — niy. Katsa mysapyrêtsa humo batu nyny aha.

— Asahi Sesus Kiristu harere bo hyỹ mykaranaha iwatsahi myspirikporêtsa tsmoziknaha iwaze amy ty isapyrênikia ty sibo nyny my — niy. <sup>10</sup>Taparaka ana soho humo batu myhyrinymyry abaka myhyrinymyrêtsa. Sesus Kiristu humo tsinymyryknaha. Sesus mymyoktyhyrykta humo tsinymyryknaha. Sesus botu mybarawy bo inasik iwatahi tsinymyryknaha. Sesus kino isapyrênikia ty mybo nyny mykara. Sesus nihyrikosokda. Iwaze harakykbyri zuruze nahyrikiziko ispitu niyzikzo. Iwatsahi katsakta mohyrikosokdanaha humo batu mypyby. Sesus wasaniha nitsasoko.

— Tsimyhyrikosokdanahaze namyhyrizikpowyzo. Mywahi Deus tuk tsimypykyryknaha — niy. Iwaze katsakta Sesus humo tsimyspirikponahaze iwatsahi tsimyhyrikosokdanaha humo batu mypyby.

<sup>11</sup>Deus botu zikwatawyhik. Sesus kape niy:

— Wasania ty motsasoko katuktsa tysihyrinymyryky — niy. Tysihyrinymyrykta my. Sesus zikwatawyhik iwatahi mykzohotsa. <sup>12</sup>Ana humo hi sinini mykara. Sesus wasaniha humo sinini mykara. Kytsa Sesus harere humo batu sispirikpo asahi ziksukyryknaha. Utakta Sesus humo kaspirikporêta. Ihumo batu kasikpyby. Abaka Sesus zikny iwatahi pikspirikpoko hỹ. Ata kino tsihyrinymyrêta. Atahi imysapyrênikita. Nawa ha ty ibo nyny icy tahi ana hi myziperyky. Hawa ha taeze Sesus myziksizo naha humo kaspihikrêta iwaze kabo nynyzo my.

<sup>13</sup>Deus wasania ty ikia abo iktsasoko. Deus harere anahi abo iktsasoko hyĩ tsimykara. Hawa zikzuruku naha humo kawata tsimyzuruku. Tyzikwatuku Sesus humo aspirikpotohikta! Kytsa humo tsamypokzitsiarēta. Iwa tsimyzuruku. Sesus Kiristu tuk zeka iwa tsimyzurukunaha. <sup>14</sup>Deus harere ty pykyhytu tynakara. Iharere iktsasoko. Ana bo hi mytsaty tsimykara. Ba aspiriktsokda huk. Deus hyrikoso mytuk mynapykyryk. Atahi mymytsumuēhīkī iwatsahi Deus harere humo ba zikspiriktsokdanaha.

#### Iwa Pauro Timoteo bo ziwatahaka.

<sup>15</sup>Kytsa Asia ezektsa zikarekbaiknaha. Ana hi botu tsiwaby. Situk Pisero zikarekek. Eremosenes kino niwatihi zikarekek. <sup>16</sup>Onesiporo zuba ziktsumuēhīkī. Kabo inakozore sakyirikrēnikitsa hurukwy eze kabo nikoze. Kahumo batu isikpyby. Atahi zikykuwyky. Ihumo kakurēta ikykara. Iwaze Deus pe iky:

— O kazo Onesiporo itukytsa humo kino niwatihi tysipokzitsikikta tsimy — iky. <sup>17</sup>Atahi Homa bo niukuru. Izumuze paikpa zikberiki iwatahu kabo zumu. <sup>18</sup>Tapara Onesiporo Epeso eze tuze ziktsumuēhīkī. Ana soho humo hi tsahyrinymyrēta. Iwatahi Deus pe my:

— O kazo ikia Onesiporo tsimypokzitsikikta. Sesus myziksizoze ihumo tsimypokzitsiarēta — my.

Iwa Deus bo itsyhyryze my.

#### Sesus Kiristu tukta babata tsipunihikrēta mozik.

**2** <sup>1</sup>— O Timoteo ikiakta katse wata tsikyzyk. Deus Sesus Kiristu mymypokzitsiki. Katsa Sesus tuktsa tsimaha. Mymypokzitsiki, iwatahi batu apyby. Amo wasani tsimykara! — my.

Tubabatu uta ahyrinymyryky. <sup>2</sup>Amy ty ahyrinymyryky naha ty tsiwabyba hỹ. Aba ustsá tsimysihyrinymyryziuku. Kytsa tysiny asaktsa aharere pykyhytu pinymyrykynaha. Ahyrinymyryky naha ty atsatu mysihyrinymyryziuku. Bykyze asahi atsatu mykaranaha ustsá kytsa mysihyrinymyrykynaha. Kytsa aharere humo motsasoziukunaha pykyhytuty mykaranaha.

<sup>3</sup>Sesus tuktsa sizubarētsa sinini mykaranaha. Ikia sinini tsimykara zeka batu apyby. Ikia sodadu wata tsimozik. Ikia Sesus Kiristu sodadu wata tsimozik. Iharere bo zuba hyĩ tsimykara. <sup>4</sup>Sodadu tapehatsa harere bo zuba hyĩ mykaraze tawata. Ikia niwatihi Sesus harere bo zuba hyĩ tsimynakara iwatahi sodadu wata tsimozik. Iwa tsimykara. Sodadu amy iakparawy ha humo batu yhỹ ziky. Tapehatsa harere bo zuba hyĩ mynakara. Ihyriziktsokzawy humo zuba mynakara. Ikia iwahaty tsimyzuruku. Sesus apehatsa my. Iwaze amy akparawy ba yhỹ ziky, iharere bo zuba hyĩ tsimykara, sodadu wata tsimozik.

<sup>5</sup>Iwaze utsal kytza motururuknahaze tapara pomoze mozihihikik. Iwaze sisopyk humo yhỹ nikara iwaze motururuknaha, niwazuba nikara. Ikia atawata tsimozik amy Deus myzehikik nahaty zuba tsimykara. Amy ty Sesus mynazihikik naha ty zuba tsimykara, iwatahi tapara zumuta wata tsimozik.

<sup>6</sup>Iwaze usta maku tatsuhuk mozikezoze. Atahi tadisahawy sukpesapy myzekezokoze tapara tadisaha. Ikia niwatihi Sesus Kiristu tsyhyryze hyriziktsokzawy humo tsimy. Hyriziktsokzawy humo tykta! Kytza mysihyrinymyryky iwa ahyriziktsokzawy. Iwaze Sesus asoho humo:

— O ikia tsamysapyrēta — my. Iwaze ikia Deus harere bo hỹ tsimykara sodadu wata. Ikia tyzibytuhukutu hawa Sesus mozihihikik yhỹ tsimy maku kytza nitururuknahaze tapara izumuta wata. Ikia Sesus tsyhyryze hyriziktsokzawy humo tsimykara maku itsuhuk eze wata. <sup>7</sup>Kaharere bo mytsatziyu tykara. Amy kaharere piwatawyky atsatu mypehatsa mykara. Atahi pahyrinymyryky.

<sup>8</sup>Deus wasaniha abo nitsasoko. Sesus Kiristu soho bo mytsaty tsimykara. Sesus Kiristu nihyrikosokda. Deus hi zihyryzikpowy iwaze ispitu niyzikzo. Dawi tsekoka Sesus niy. Ata hi zihyryzikpozo. Deus wasaniha nitsasokoze ana hi iktsasoko. <sup>9</sup>Deus harere iktsasoko ana humo hi sinini mykara. Kytza sakyriukrēnikitsa hurukwy bo zikorokiknaha. Karikutsitsiwytsa ty zikektsawarakanaha. Iwatahi batu pāo my. Iwatatu Deus harere sihumo ba zikpyk. Deus sohowy ba pyk ziky. <sup>10</sup>Iwatahi sinini mykara. Kytza asahi Deus nisiwatawyhyk sitsyhyryze sinini mykara, iwatsahi Deus wasania ty piwabykynaha. Sinini mykaraze iwatsahi Sesus humo sispirikporētsa. Sesus Deus bo mysioktyhyryk katsa mywatsa Deus bo mysioktyhyryk. Simysapyrētsa moziknaha. Deus tuk asatu mynapykyryknaha tahawahi Deus tuk mynapykyryknaha. <sup>11</sup>Hawa botu katsaktsa tsiwabynaha ana harere wasani my. Utakta niwatihi ahabo iktsasoko aba motsasokozo.

— Kytza Sesus pokzi mymybanaha zeka iwatsa tu ituk namyhyryzikpobawyzo.

Tsinahyryzikponaha zeka ituk mywahi tsinapykyryknaha.

<sup>12</sup>Sinini tsimykaranaha zeka Sesus Kiristu pokzi mypehakatsa watsa tsimoziknaha.

Katsaktsa kytza pe tsimaha zeka: “O utakta batu Sesus tukta my. Sesus batu kanyhy” tsimykaranaha. Iwaze Sesus niwatihi mype my: “O uta kino batu kanyhy my.

Asahi batu katuktsa my” niy.

<sup>13</sup>Iharere bo hỹ ahabyizeka iharere humo mynapykyryk.

Iharere wasani my.

Tapara nitsasoko atsatyty mykara  
iharere tisapyrēna hỹ.

Tawahi nitsasoko iwaze atsatu — mykara.

### Deus tsumuêhĩtsa tsimysapyrêta.

<sup>14</sup>Ikia awabytsitsa bo tsimy. Iwa tsimysihyrinymyryky. Mytsatzyiu tsimy Deus pawabyky. Deus okzeka tsimysihyrinymyryky. Ispe tsimy:

— Pykyhytutaha kytsa! Ahaharere humo ahape ty peha peha byitaha iwa zeka ustsá kytsa mysisapybyrinaha. Iwazeka kytsa ba ziksitsumuêhĩnaha. Kytsa pahawabykynahaze Sesus humo batu sispirikpo. Iwazeka ahaharere humo ba zikspirikponaha — tsimy. Iwa awabytsitsa bo tsimy.

<sup>15</sup>Wasani tyzurukukta! Pykyhytuty wasani tyzurukukta! Iwaze Deus asoho tihi:

— Atakta tsimysapyrêta. Kaokzeka wasani mykara — my. Wasani tsimyzuruku zeka batu asikpyby. Deus ahyriziktsokzawy bo iksa myzeka batu asikpyby. Deus harere ty kytsa tsihyrinymyrykik. Tsihyrinymyry baba iwa abo my.

<sup>16</sup>Kytsa asahi siharerewabymybaranikitsa ana ka Deus batu iakparawy. Ikia kino batu situk tsimypamykysoko asaktsa kytsa ba ziksitsumuêhĩ. Sesus humo sispirikporêtsa ba ziksitsumuêhĩ. Iwa siwabysitsa batu imysapy nikaranaha. Iwaze sibo ba ziktsaso. Siharere ba ziktsaso. Asaktsa ustsá kytsa mysisapybyrikinaha.

<sup>17</sup>Sispirikpowy mykôrôrôtsa watsa. Inury piokbakanaha. Hawa inury mykôrôrôtsa humo piokbakanaha, kytsa Sesus humo ba sispirikpo tahaspirikpowy zimyikiknaha iwatsahi sispirikpowy mykôrôrôtsa watsa. Asahi myhyrinymyrykynaha zeka kytsa Sesus humo batu sispirikpo. Situk estuba maku Imeneu inarokota, usta Pireto inarokota, iwatsa sispirikpowy kino mykôrôrôtsa watsa. Sispirikpowy humo kytsa Sesus harere bo batu yhỹ niaha. <sup>18</sup>Wastuhu Sesus tuktsa siharere ziwabykynaha. Asahi siharere bo asiba yhỹ niaha. Iwaze Sesus harere humo asiba ziakbatanahaze batu yhỹ niaha. Asa tihi:

— Kytsa niakbakanahatsa botu bjoikpe bo nidoknaha — mybarapetu nikaranaha.

— Deus mybarawy ezektsa nisierekek — mybarapetu nikaranaha. Kytsa anahi ziwabynahaze paikpa mytsaty nikaranaha. Kytsa jakara bo nizaranahatsa watsa niyziknaha. Sispirikpowy humo paikpa mytsaty nikaranaha. Iwatsahi wastuhu Sesus tuktsa Sesus harere bo asiba batu yhỹ nikaranaha. <sup>19</sup>Katsa hiba Deus harere humo tsinymyrykynaha. Ustsá kytsa simyspihikbatanikitsa sihumo batu mospirikpo. Deus harere zuba tsiwabynaha. Mypehakatsa tahyrytsa humo tsihyrinymyrêta hỹ. Aty motsasoikik:

— O katsaktsa Deus hyrytsa — tsimaha. Deus ispe my:

— Ahasapybyri tsmoewynaha! — niy. Iwa Deus tahyrytsa bo motsasoko.

<sup>20</sup>Myporosuktsa mywahoro eze sizubarētsa tsimykaranaha. Wastuhu zuba pibiyituhukunaha tu tsimykaranaha. Utsa batu. Katsa mymyikaha boktsa zubatsa myporosuktsa sisapyrētsa tsimykaranaha. Mymyikaha humo morosuk tsisapyrēna tsimykaranaha. Katsaktsa myporosuktsa watsa. <sup>21</sup>Hawa katsa morosuk tsisapyrēna tyakse tsihikik mymyikaha boktsa zubatsa, Deus hyriziktsokzawy humo mymykse tsihikik. Deus okzeka wasani tsimoziknaha. Iwaze Deus mype my:

— O ikiahatsa katsumuēhītsa tsimoziknaha. Ikiyahatsa humo kakurēta. Amy humo wasani tsimykaranaha! — mykara. Iwatsahi morosuktsa watsa tsimoziknaha atakta mymyikahaze tsimykaranaha. Deus mysoho:

— O ikiahatsa tsamysapyrētsa tsimaha. Iwatahi ikiahatsa katsyhyryze tarabaja tsimykaranaha — my. Tarabaja tsizubarēna humo mykyzodiharētsa tsimykaranaha kahumo kytsa Sesus harere mysihyrinymyryky my. Mysapybyitsa tsikykaranaha botu tahamoewyhih ana humo hi Deus tsakurēta h̄y.

<sup>22</sup>— O Timoteo ikia ba mykyryburuktsa wata tsimykururu! Asahi imysapybyitsa zuba mykaranaha. Utsa okeza mysihuahuakanaha. Ikiakta hawa wasani zuba tsimyzuruku. Imysapybara humo ka ikiakta batu yh̄y ziky. Sesus Kiristu humo aspirikpohukta! Kytsa tysipokzitsiki. Kytsa humo batu akyri. Maku tsimysapyrēta Deus bo mopamykysoko. “O Deus myzo tsisapyrēna humo tsiktsumuēhī my”. Iki niwatihikta ituk tawata tsimysapyrēta tsimozik — my.

<sup>23</sup>Kytsa asahi sipehatsitsa zuba batu siharere ty batu tyso. Iki sibo tsimypamykysoko zeka tsipahabetsakwynaha.

<sup>24</sup>Mypehakatsa tsumuēhītsaktsa ba zikmybetsaknaha. Kytsa mympokzitsiki. Deus harere mysihyrinymyryziuku. Kytsa harere piwabyziuku, iwatahi mysihyrinymyryziuku. <sup>25</sup>Aty myharere ty wabyziu zeky byizeka batu ziksibetsak. Wasanikia ty tsimy. Sibo tsimytsasoko. Aibani tozeka ja aharere humo simysapybyitsa mykaranaha mysimoewyhihknaha Deus mysitsumuēhī iwatsahi simysapybyitsa mykaranaha mysimoewyhihknaha. Aharere humo sispirikporētsa moziknaha. <sup>26</sup>Tubabatu hyrikoso sapybara pehakatsa nisispihikbataka iwaze tahawerekywy nahatsa watsa niaha. Siraratsa tahawerekywy bo nipupunaha. Astsatu kytsa hyrikoso sapybara pehatsa harere bo yh̄y mykaranaha. Siraratsa tahawerekywy naha tsawatsa. Iwa kytsa sispirikpobyitsa zeka hyrikoso sapybara pehatsa harere bo yh̄y nikaranaha. Iwa mozurukunaha. Bykyzehu tozeka ja aharere humo hyrikoso sapybara pehatsa bo ba yh̄y zikaha. Amy ty wasania ty zuba yh̄y mykaranaha.

**Aibani zuba ziharawybabaka tsihokdaharēna iwatsahi pykyhytutaha.**

**3** <sup>1</sup>Kaharere bo mytsatzyiutaha. Sesus harazetu kytsa sinini mynakaranaha. Sesus tuktsa Deus harere bo hȳh mynakaranahaze

tshokdaharēna mozik. Kytsa simysapybyitsa mykaranaha sihumo tshokdaharēna mozik.

<sup>2</sup>Kytsa asa zuba mynakaranaha. Sisorekanikitsa. Sisakimiyjarētsa mykaranaha okyrysaro tsihitsa mozihikiknaha. Motsasokonaha — Katsa zuba myhyrinymyrētsa — mybarapetu mynakaranaha. Myhyrinymyrētsa mytsaty ahabyitsa mynakaranaha. Siharerewabymybarētsa. Kytsa tahanamy ty harape bo nyny maha zeka:

— O ikia tsimysapyrēta ana humo hi mykurētsa — iwahaty batu harere. Tahazotsa harere bo batu ma zikaha. Deus harere humo batu wabyziu zikaha. <sup>3</sup>Tatukytsa humo niwatihi tahasopyksapybyri mynakaranaha. Batu aty tohi humo simypokzitsiu. Kytsa sizubarētsa humo sisopyksapybyitsa mynakaranaha. Zikaharapeziunahabyitsa. Batu tahapetu sisopyk iwatsahi tahamysapybyrity mykaranaha batu tymoewy. Sizokdirētsa. Zikasihokyknahabyitsa. <sup>4</sup>Situkytsa sisukyrytsitsa bo mysioktyhyryknaha. Mysibanaha bo. Simytsatyhybyitsa tu iwatsahi batu simysapy mynakaranaha. Motsasokonaha:

— O uta zuba wasani. Uta myhyrizikwani — mykaranaha. Deus humo batu siakparawy iwatahi Deus batu iaku. Asa zuba sakurētsa. Mynazihikiknaha ty zuba mykaranaha. <sup>5</sup>Asahi:

— O katsakta Deus hyrytsa — mybarapetu mykaranaha. Deus zikwy humo batu sihyrinymyry. Amy mozihikiknaha humo zuba mykaranaha. Deus harere bo batu h̄y mynakaranaha. Deus hyrikoso humo batu sihyrinymyry. Ikiia situk tsimy kara zeka tyserekekta my.

<sup>6-7</sup>Wastuhu wytykyryk mysispihikbatakanaha. Wytykyryk asizahi batu mytsaty zikaha. Mysimiywykynaha. Siwakyrizerēza.

— O katsaktsaza Deus harere tsipinymyrynaha — mykaranaha. Batu sihyrinymyry. Tsikaeni zuba zinymyrynaha. Iwazahi batu sispirikpo Deus harere bo batu h̄y zikaha. Iwaze kytsa asahi mybarapetu ziknakaranaha wytykyryk pe maha. Siwahoro bo kytsa papatu ziknapupukunaha. Inapupunahaze imysapybara ty ziknasihyrinymyrykynaha. Iwazahi wytykyryk Deus harere humo batu sispirikpo.

<sup>8</sup>Tubabatu Moises Deus harere baba ziknatsasoko. Sābores Sānes ahatsa Moises harere humo batu siakparawy. Deus harere baba humo batu siakparawy. Kytsa simyspihikbatanikitsa watsa. Astsatu mykaranaha. Kytsa bo mybarapetu mykaranaha, iwatsa tu Deus harere humo batu siakparawy. Sesus harere humo batu sispirikpo. <sup>9</sup>Kytsa sihyrinymyrytsa pe:

— Batu amy tohi ty isty hyrinymyry — nikaranaha. Taparaktsa tubabatu astatu Sānes Sābores ahatsa bo niwatihi ziknakaranaha. Astatu kytsa bo ziknakaranaha. Iwatsahi sizubarētsa tihi:

— Batu amy tohi ty ziksihyrinymyrynaha iwatsahi batu mywabyhy — nikaranaha.

**Abaka kasohowy asiba nepyk wabyty tsimy.**

<sup>10</sup>O Timoteo hawa mozuruku naha humo tsahyrinymyrëta. Kytsa nasihrinymyryky anaha humo kino tsahyrinymyrëta. Hawa Sesus humo kaspirikporëta ana humo kino niwatihi tsahyrinymyrëta. Hawa kytsa humo batu kasakpare uta hi nasipokzitsiki ana humo kino tsahyrinymyrëta. Kakubyrisorokrëta. Hawa sinini ikykara ana humo kino tsahyrinymyrëta.

<sup>11</sup>Kytsa asahi Sesus humo batu sispirikpo asahi zikziksiniwiykynaha. Ætiokia eze sinini ziknakara. Ikonio eze niwatihi sinini ziknakara. Risitera eze niwatihi sinini ziknakara. Sesus hi mypehakatsa zikbetesaka. Ziktsumuëhîkî. Ana humo hi tsahyrinymyrëta. <sup>12</sup>Katsaksa Deus harere bo hyÿ tsimykaranaha zeka kytsa mymysininiwiykynaha. Asahi Sesus Kiristu humo batu sispirikpo iwatsahi mymysininiwiykynaha.

<sup>13</sup>Kytsa asahi batu simysapybyitsa mykaranaha mysihrinymyrykynaha. Simysapybyitsa babatsa mynakaranaha. Kytsa mysipihikbatakanaha. Utsa kytsa kino niwatihi sibo mybarapetu mykaranaha. Paikpa myharape spihikbataikiknaha.

<sup>14</sup>Hawa zahyrinymyryky nawa tsimyzuruku. Hawa taparaktsa sihrinymyrëtsa zahyrinymyrykynaha nawa tsimyzuruku. Siharere wasani my ana humo hi tsahyrinymyrëta. Iwatahi siharere bo hyÿ tynakara.

<sup>15</sup>Ikia jabastuze Deus harere papeu humo iwatahaha tsinykyry. Iharere humo tspirikporëta tsmozik. Ana papeu tsipinykyze hawa Deus tuk tsimynapykyryknaha ana hi tsinymyryky. Sesus Kiristu humo tsimyspirikpo zeka Deus bo mymyoktyhyryk.

<sup>16</sup>Tubabatu mydiritsa Deus harere ziwatahakanaha. Iharere ziwatahakanahaze Deus zikwy humo sihrinymyrëtsa. Iharere wasani my. Ana papeu tisapyrëna niy. Iwatsahi Deus harere wasani humo tanymyryky. Amysapybyita tsimykara zeka amysapybyiri ka tsmoewybaik. Aty pimiyiki zeka papeu humo amywiwyhy piwatawy. Hawa wasani haty papeu humo mysopyk mymywatawyky. Hawa Sesus tuktsa mozurukunahaze anahi mymywatawyky. <sup>17</sup>Deus tsumuëhîtsa iharere papeu humo iwatahaha pinymyryky. Deus iakparawy ty zuba pinymyryky. Ana bo zuba Deus tsumuëhîtsa papeu humo yhÿ mykara. Imysapyhaty zuba mynakara mekywa humo tisapyrëna mykara, Deus harere papeu humo. Utsa niwatihi mysitsumuëhî. Nanabyi humo niwatihi wasani mynakara myziwatawyky Deus harere papeu humo. Iwaha hÿ.

**4** <sup>1</sup>Abaka Deus okzeka abo motsasoko tsiwabytoktokta! Sesus Kiristu okzeka niwatihi abo motsasoko. Atakta myziksizoze hawa kytsa mozurukunaha soho motsasoko. Atahi kytsa simysapyrëtsa pe my:



— O ikiahatsa wasani ziknakaranaha — my. Utsa kytsa simysapybyitsa pe my:

— O ikiahatsa batu ahamysapybyitsa ziknakaranaha — my. Iwa kytsa myzubarêtsa pe my. Kytsa sispitutsa pe my iwaze niakbakanahatsa pe kino niwatihi my. Myzubaha pe my. Sesus Kiristu myziksizoze iwa my. Simysapybyitsa ziknakaranahatsa pe my:

— Ikiahatsakta sinini ykarawy bo taha! — my. Anabo mysipehahik. Iwaze simysapyrêtsa pe my:

— O ikiahatsakta pahasapywyky — my.

Iwa myziksizoze tatuktsa tuk my. <sup>2</sup>Iwatahi iharere tynatsasokokta! Tsihokdahrênaze kino iharere tytsasoikik. Ihokdaha byize kino niwatihi tytsasoikik. Kytsa imyitsitsa tynasibetsakak:

— O amo imysapybyitsa zeka tysimoewyihikta! Sesus humo tyspirikponahaktsa! Ahapunihkrêtsakta — tsimy iwatsahi simysapyrêtsa moziknaha. Asakparebyijaty. Akubyrisorokok ja tsimy. Iwa tysihyrinomyryky.

<sup>3</sup>Bykzehu kytsa ispirikpowy babata ba ziwabynaha. Iharere atakta batu ziky. Amo siakparawy zuba ana bo hi yhÿ mykaranaha. Kytsa amy zimyikinaha ana ty hi mysihyrinomyrykynaha. Ana hi siakparawy. Iwatsahi sihrinomyrytsitsa bo piwaby tsihikiknaha iwaze amy ty siakparawy piwabykynaha. <sup>4</sup>Deus harere batu siwabyhy. Amy imysapybara zuba piwabykynaha. <sup>5</sup>Ikia Timoteo pykyhytuty. Hawa tsimyzuruku naha humo pykyhytuty iwazeka wasani tsimynakara. Sinini tsimylaraze tsapunihkrêta tsimozik. Deus wasaniha tsinatsasoko. Deus zawatawy itsumuêhÿtsa tsimozik, iwatahi tsipitsumuêhÿkÿ.

<sup>6</sup>Hawaeze ja kytsa pikbezenaha batu sispirikpo. Utakta sirara wata. Tubabatu kytsa siraratsa ty Deus bo nyny ziknakaranahaze tapara nisibakanahaze ky wa. Uta niwatihi hawa eze ja kytsa pikbezenahaze utatu Deus bo katy nyny my Deus pokzi pikbezenahaze Sesus pokzi ba ziktakyri.

<sup>7</sup>Uta kaokzetuze Deus harere motsasoziuku zuba mynatsasoikik. Sesus humo kaspirikporêta ziknakara. Utsa kytsa kahumo Deus harere bo yhÿ mykaranaha. Sesus Kiristu zikzitsumuêhÿekik pyk ahabyita ziknakara, zikzibytuhukutu Sesus Kiristu tsyhyryze zikzitsumuêhÿekik. Hawaeze ja mohyrikosokda amy ty Deus kape ziknakaranaha ty tsizubarêna humo ma ikykara. <sup>8</sup>Kakubyrisorokrêta Deus tsyhyryze zikzitsumuêhÿkik. Hawa kytsa sizubarêtsa motururuknahaze tapara estuba siharaze pomo tahi iwaze kytsa ipe maha:

— O ikiakta tsipisapybaka — mykaranaha. Iwa mypehakatsa Sesus kytsa sizubarêtsa okzeka kape my:

— O ikia tsisapybaka ikia wasani tsikykara. Deus zabetesaka iwatahi amysapyrêta tsikyzyk — my.

Kakubyrisorokrêta Sesus kasoho humo harereziu mykara. Myziksizoze kasoho kytsa bo iwa motsaso. Mypehakatsa wasani mykara. Hawa tsimyzurukunaha bo iktsa ziknakara. Myziksizoze ustsa bo niwatihi:


— Ikiahatsa wasani tsikykaranaha. Deus okzeka wasani tsikykaranaha — my. Iwa motsaso taperytsitsa bo motsaso. Iwatsahi taperyky myziksizo naha humo tsimyzihikiknaha.

### Timoteo ikia bo zuba mopamykyso.

<sup>9</sup>Abaka kabo aidytynykta asukmotsihik zeka. <sup>10</sup>Kytsa katuktsa zikarekbaiknaha. Demas tanamy bo zuba mytsaty mynakara. Zikarekek zuba. Tesaronika bo niparak. Keresête Karatas bo niparak. Titu Daramasia bo niukuru iwa nikaranaha. <sup>11</sup>Rukas zuba katuk nitare. Ikiakta Marakos tyziberikta! Ibo tsipomo zeka atuk tyziokty. Marakos Deus hyriziktsokzawy humo piksumuêhĩ. <sup>12</sup>Tikiko pe my:

— O ikia Epeso bokta! — iky. Hyÿ niy. <sup>13</sup>Kabo tsinaparak zeka kakpyzawawy tuk tuja. Toroad eze Karapo wahoro eze tihi ikzerekek. Papeu tuktu. Riweros tsapyrêna asahi siraratsa hwyk hi tyzibykyk. Riweros kino tynasibykykta tsimy.

<sup>14</sup>Aresädere zikmyijaka. Atahi pero tuk tarabaja ziknakara. Hawa zikmyijaka naha humo mypehakatsa tsihyrinymyrêta atahi ana



(2 Timoteo 4.13)

sohotyhi ibo mykara. <sup>15</sup>Ity pykyhytuty ihumo tsimy. Ihumo amytsatyhyhokta tsimykara. Myharere iakparawy byita tsakryiukrêta. Atahi:

— Ikiahatsa ahamysapybyitsa tsimykaranaha — niy. Tsipihobyk zeka amytsatyhyhokta tsimy.

<sup>16</sup>Tapara Sesa abazubata tuktsa okzeka iktsasoko utakta kasoho iktsasoko. Batu aty tohi zikbetesa:

— O atahi tsimysapyrêta my. Amy imyiki batu mykara — niy. Batu aty tohi iwa kasoho ty batu tyso. Sizubarêtsa zikarekbaiknaha. — O mytuktsa tsimaha — mybarapetu nikaranaha. Iwaze Deus tihi sisoho batu hÿ my. Deus ispe:

— O ikiahatsa Pauro tsikzerekbaiknaha. Kaokzeka ahamysapybyitsa tsimykaranaha. Pauro tsikzerekiknaha humo ahamysapybyitsa tsimykaranaha — my.

Iwa Deus sisoho motsaso zeka kasoho humo batu hÿ my. Iwaze utakta Deus bo mopamykysoko:

— O kazo kasoho humo kytsa humo aty kyri kyri byity. Uta sihumo batu kakyri. Asahi zikarikiknaha sihumo batu aty kyri kyri

byity — my. <sup>17</sup>Asahi zikarikiknaha. Mypehakatsa zuba katuk nitare. Atahi ziktsumuēhīkī. Iwatahi Sudeutsabyitsa bo Deus wasania ty motsasoko. Kytsa sizubarētsa Sudeutsabyitsa Deus wasania ty motsasobaka mypehakatsa zikwy ziktsumuēhī. Atahi zikoktyhyryk. Kytsa parinitsa watsa, sakyriukrētsa zikbezekyzykynaha mypehakatsa zikoktyhyryk. <sup>18</sup>Mypehakatsa, kytsa zikbezekyzykynahaze zikbetesaka. Mohyrikosokdaze pikoktyhyryk ituk kawahi mynapykyryk, mynahyryzikpoze Sesus tuk kawahi mynapykyryk. Atahi abazuba sipehatsa mozik. Iwaze sizubarētsa tihi:

— O ikia zuba tsamysapyrēta awahi amysapyrēnikita — tsimaha hỹ. Iwa ibo tsimytsasokonaha hỹ.

### **Myzubaha humo kahyryzikbarēta.**

<sup>19</sup>Uta Pirisira Akiro ahatsa humo kahyryzikbarēta. Onesiporo itukytsa niwatihi iwatsa humo kahyryzikbarēta. Iwa sibo tsimytsasoko, sihumo kahyryzikbarēta hỹ. <sup>20</sup>Erasto Korīto eze nitare. Teropemo tsimytsapyrēta iwatahi Miretus eze ikzerekek. <sup>21</sup>Ikia kabo tyzumu. Hyrytsik wōbyitu tyzumu hỹ. Katukytsa Euburus, Pudēs, Rinus, Kaudio ustsā niwatihi iwatsa ahumo tsihapyrykyknaha maha.

### **Deus pahasapywyky.**

<sup>22</sup>O Timoteo atsyhyryze Deus bo mopamykysoko ipe mykara:

— O Deus myzo ikia humo Timoteo tsipunihkrēta mozik. O myzo Sesus tuktsa kino niwatihi tysipokzitsiki — my. Iwa atsyhyryze Deus bo mopamykysoko. Iwa hỹ. De.

Pauro